affermoyent le bas de la ville tant seulement deuoir périr, pour le ne sçay quelle occasion imaginée en leur cerueau. Et à fin que tu sois mieux informé de ce fait, le te feray un brief récit de la situation de la ville. Lyon tient partie de la montagne, partie du plat pays : du costé de la montagne il regarde le pays de Forest, et a pour ses bornes la Saone, fleuve fort doux et non impétueux, sur lequel il y a vn pont qui ioint les deux parties de la ville: du costé du plat pays, il a son aspect sur le Dauphiné, duquel il est séparé par le Rosne, et conioint par vn pont fort ample, finissant à vn bourg nommé la Guillotiere, tellement que ceste partie est presque enclose du Rosne et de la Saone, qui a esté aucunement cause au peuple de plus grande frayeur et espouuantement. Doncques pour reuenir a nostre propos le Rosne commençant à inonder le bas de la ville et petit à petit à l'occuper, plusieurs des habitans s'enfuyant gaignoyent la montagne, avec tel effroy, que ie ne sache celui à qui, voyant ceste pitié, les cheueux ne fussent dressez en la teste : les autres plus constans, euitant la furie de l'eau, se sauuoyent de rue en rue, quittans leurs maisons, meubles et autres choses precieuses, comme si plus ils n'en eussent eu affaire : les autres aussi surpris par l'impetuosité, se iettoyent à travers l'eau auec ce qu'ils pouuoyent emporter et sauuer: d'autre costé on n'oyoit que regrets et plaintes : les vns de leurs femmes, les femmes de leurs maris, ou ensans accablez sous les maisons qui trébuchoyent ou noyez: autres de leurs parens, amis ou voisins, pour les voir en peine : les vns aussi de leurs maisons ou métairies abattues par la violence de l'eau, les autres de leur bestail submergé et perdu. Et ce qui d'auantage esmouuoit vn chacun à compassion, les pauures gens de village se sauuans au mieux qu'il leur estoit possible de leurs maisons submergées, les vns fort pauurement, les autres auec ce qu'ils auoyent peu retirer et conseruer : autres portans aussi leurs enfans entre les bras, les uns vifs, les autres morts. O misere, o calamité, o temps fort déplorable! Voir plusieurs en grande langueur et detresse, et eslonguez de toute aide et secours, misérablement perir : pauures petits enfans dans leur berceau agitez et poussez deça dela crier miséricorde : quelques villages cachez sous l'eau : maisons tomber, fondre et s'abbaisser : bestail, languissant transir et mourir : terres par l'inondation gastees : le laboureur se desesperant pour estre frustré de son attente: n'est-ce chose fort pittoyable, et digne de la mémoire d'vn chacun? Si puis-ie bien assurer que Messieurs de la Justice et du Corps de la ville ont pourueu si promptement et si diligemment à tel désastre, qu'il ne se pourra dire qu'aucun soit péri par leur négligence et faute, ni de ceux qui y pounoyent suruenir. Car d'y avoir espargné chose qui fut en leur puissance, ie ne sache celuy qui s'en osast plaindre, ainsi qui ne die les auoir